



KENYATAAN MEDIA

PENGAWALAN SEMASA FASA PERALIHAN

Bandar Seri Begawan, Sabtu, 27 November 2021

Berkaitan Pelanjutan Operasi Peralihan

Pada menjunjung titah perkenan Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Marhum Sultan Haji Omar 'Ali Saifuddien Sa'adul Khairi Waddien, Sultan dan Yang Di-Pertuan Negara Brunei Darussalam dan mengambilkira situasi jangkitan wabak COVID-19 serta keperluan bagi menilai dengan lebih lanjut impak Fasa Peralihan yang baru saja bermula pada 19hb November 2021, Jawatankuasa Pandu COVID-19 ingin memaklumkan bahawa langkah-langkah pengawalan "Operasi Peralihan" iaitu arahan untuk berada di rumah atau kediaman masing-masing dari jam 10.00 malam sehingga 4.00 pagi adalah **dilanjutkan selama dua (2) minggu lagi iaitu mulai hari Rabu, 1 Disember 2021 sehingga hari Selasa, 14 Disember 2021.**

Pelanjutan "Operasi Peralihan" ini adalah bagi terus memastikan kebaikan dan kesejahteraan semua pihak terus terjamin. Oleh itu, orang awam adalah dinasihatkan untuk mematuhi segala arahan atau peraturan yang ditetapkan oleh pihak Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam sama-sama bekerjasama untuk membendung risiko penularan jangkitan COVID-19 di negara ini.

Berkaitan Perubahan Syarat Semasa Fasa Peralihan

Sebagai langkah persediaan bagi kita menuju ke Fasa Endemik maka bermula **1hb Disember 2021**, individu-individu yang belum melengkapkan vaksinasi mereka adalah dibolehkan untuk kembali bertugas ke pejabat. Walau bagaimanapun, mereka adalah dikehendaki untuk menjalani **ujian ART setiap dua (2) hari**. Bagi kakitangan yang telah menerima satu dos vaksinasi dan sedang menunggu untuk mendapatkan dos kedua atau dikecualikan daripada mendapatkan vaksin COVID-19 disebabkan oleh masalah kesihatan, perbelanjaan ujian ART akan ditanggung oleh majikan masing-masing. Akan tetapi bagi kakitangan yang tidak divaksinasi atas pilihan sendiri atau sebab peribadi (iaitu bukan dikecualikan atas sebab kesihatan), mereka hendaklah menanggung perbelanjaan ujian ART masing-masing.



Berkaitan Penangguhan Sementara Kebenaran Kemasukan dan Keluar Negeri bagi Negara-Negara di Afrika Selatan

Seterusnya, berikutan terdapatnya laporan mengenai varian baru COVID-19 yang dinamakan varian *Omicron* yang dilaporkan pertama kali dikesan di Afrika, Jawatankuasa Pandu COVID-19 dengan ini memaklumkan bahawa **kebenaran kemasukan dan keluar negeri bagi LAPAN (8) buah negara di Afrika, iaitu Afrika Selatan, Botswana, Eswatini, Lesotho, Malawi, Mozambique, Namibia, dan Zimbabwe, adalah dengan ini ditangguhkan sementara dengan serta merta sehingga ke satu tarikh yang akan dimaklumkan kemudian.**

Penangguhan kebenaran ini juga dikenakan bagi warganegara asing yang telah diberikan kebenaran awal untuk memasuki Negara Brunei Darussalam dari negara-negara berkenaan melalui penerbangan yang telah dibenarkan sebelum ini, maka kebenaran tersebut adalah juga ditarik balik.

Penangguhan kebenaran keluar dan masuk ini adalah sebagai langkah tambahan bagi memberikan ruang kepada pihak Kerajaan untuk memantau dan meneliti dengan lebih mendalam mengenai varian baru tersebut. Walau bagaimanapun, perlu diingat bahawa kemunculan varian-varian baru memang satu perkara yang biasa dalam evolusi kebanyakan virus termasuk COVID-19 ini. Insya Allah, dengan usaha negara ini meningkatkan liputan vaksinasi termasuk juga vaksinasi penggalak (*booster*) akan dapat melindungi rakyat dan penduduk Negara Brunei Darussalam ke arah pemulihan ke Fasa Endemik dengan selamat.

Oleh itu, marilah kita sama-sama mendokong hasrat kerajaan supaya kita semua turut sama-sama memelihara keselamatan dan kesejahteraan awam dengan mematuhi protokol kesihatan dan garis panduan yang telah ditetapkan. Di atas kerjasama semua pihak setentunya sangat-sangat dihargai. Kita hendaklah terus berdoa dan sama-sama berusaha di samping bertawakal kepada Allah *Subhaanahu Wata'ala* supaya kita dihindari dan terselamat daripada penyakit wabak COVID-19.

JAWATANKUASA PANDU COVID-19

Jalan Perdana Menteri
Bandar Seri Begawan BB3913
Negara Brunei Darussalam

22 Rabiulakhir 1443
27 November 2021